




AMODIOZKOAK

KONTZEEZIRI

1

Maitebat maitatzen det maitagarria
Begi ederra du ta guztiz argia;
Daukat urruti,
Bañan ezin kendu det buruti
Aren itxura;
Saldu albaliteke pisura,
Urrearen truke
Nork erosi faltako ez luke.
Nork erosi, etc.

2

Ogeita lau leguaz nago aparte,
Bitartean ba dauzkat milloi bat ate,
Guztiak itxirik;
Nai arren ezin egon ixillik;
Beti negarrez,
Nere maite maitearen galdez:
Otedan bizi,
Biotz-biotz nereko Kontzezi,
Biotz-biotz nereko, etc.

3

Egunaz argi gutxi, gauean illun,
Konsuelorik ez da neretzat inun
Maitea gabe;
Egin otenadiñ aren jabe
Oroitutzean,
Zenbait pena nere biotzean
Ditut igaro;
Maite det eta ez da milagro,
Maitet det eta, etc.

4

Ai au bakardadea eta tristura!
Nere biotz gaxoa ezin piztu da,
ain dago illa;
Beti dabil konsuelo billa,
Bere artean,
Banengo maitearen aldean,
Ordutxo biko,
Pena guztiaz lirake ilko.
Pena guztiak, etc.

5

Nere maitea zutzaz ni oroitzen naiz
Egunaz ere baita gauetan txit maiz,
Lotan ere bai;
Zu ikusitzera nik joan nai;
Libre banengo
Or nintzake egun bigarrenko,
Naiz orduan ill,
Ez nuke izango batere miñ.
Ez nuke, etc.

6

Leneko gau batean egin det amets,
Bañan pentsamentuak beti al rebes
Irteten dira;
Ustez nengoen zuri begira,
Maite polita,
Kofrearen gañean jarrita,
Kontu kontari,
Nai nuen bañan ez nintzan ari.
Nai nuen bañan, etc.

7

Maite nerea daukat beti gogoan:
Ai orain banengo ni aren alboan
Iñoiz bezala!
Jaunak amets au kunpli dezala,
Balitz konbeni,
Konsueloz ilko nintzake ni
Nere ustean,
Maitetxoren biotza ikustean.
Maitetxoren biotza, etc.

8

Nere maite polita ez da zer etsi,
Bigar ez pada ere or nazu etzi
Lengo lekuan,
Allegatutzen naizan orduan,
Ai ura poza,
Nere maite maitetxo biotza!
Zuri begira,
Pena guztiak aztuko dira.
Pena guztiak, etc.

9

Zure gauza polit bat oi det nerekin,
Izkidaturik dago letra birekin:
K ta B dira,
Askotan nego oei begira;
Ain dira piñak!
Maitetxo polita, zuk egiñak
Sedaz ederki;
Kolkoan gorderik dauzkat beti.
Kolkoan gorderik, etc.

10

Esperantzetan bizi, maite gozoa,
Noizbait kunplituko da gure plazoa;
Eta orduan,
Gauza txarrik ez artu buruan;
Lengoai utzi,
Ez degu pasatzen pena gutxi;
Preso sei urtez
Onduko gaituzte nere ustez.
Onduko gaituzte, etc.

ATSEGIÑETAN ARKITZEN NAIZ

1

Atsegiñetan arkitzen naiz ni
arkitzen naiz ni
ezkontzen diralako maite gozo bi
gustora
artako jaio ziran mundura
Gipuzkoa guztia txit poztu da.

2

Alaiak dira ezkongai biak
ezkongai biak
diralako euskaldun garbi garbiak
zañeti
ekusten dan gauza beti beti
fruta pin gozoa txertu oneti.

3

Jatorri ona irozo dedin
irozo dedin
ezkontza naigarri au gogoz da egin
segurki
doai au etorri zaie zeruti
ala bearrez bide zuzeneti.

4

Don Pedro Jose bai Ituriza
bai Ituriza
Azpeitian egin du gustoko eiza
emeki
tirabidean jarririk zuzenki
gauza ona zer dan berak badaki.

5

Galai prestu au pare bake da
pare bage da
artzen du emaztezt Doña Ageda
maitaro
gau gozo anitz ditzeke igaro
aren enbidian zenbait badago.

6

Emazte eder ta aberatsa
ta aberatsa
gizona, badagoke onekin lasa
munduan
gerra gaizto au bukatu ondoan
pozkidatuaz beraren alboan.

7

Seme galantak eta txit anitz
eta txit anitz
eragiteko eran jarriko balitz;
nai nuke
aitaren antza izango balute
Gipuzkoak guztiz mesede luke.

8

Ekusiko da bizi bagera
bizi bagera
seme askoren ama Doña Ageda
errian
Iturrizaz beterik ur garbian
etxeandre enitzen enbidian.

9

Lanari gogoz lenbaitlen ekin
lenbait-len ekin
asi bage ez baidu izango berdin
batere,
elizak artako jarriak daude
ez arren gelditu semerik bage.

10

Gau ta egun oso guztiak
oso guztiak
Iturrizak daduzka gozo eztiak
benetan
lenago ibilli baita neketan
baita ere asko aldiz kezketan.

11

Orain batere beldurrik bage
beldurrik bage
egin dalako andre onaren jabe
erazki
gusto onekoa artu du lazki
ditxa on asko berarekin daukazki.

12

Agur Don Pedro Brigadaria
Brigadaria
guztiz toki onean dago larria
betiko
dadukan onorea, nerekiko,
ez dio inork ere eregiko.

AMODIO BEROAK

1

Amodio beroak
guztiz arrigarri,
nere biotza dauka
estu eta larri:
adirazo naiean
argi eta garbi,
nere sentimentuak
dama eder bati.

2

Biotz biotz nereko
txantxantxo argia,
esango dizut nere
barrungo barria:
gaztetan izandu naiz
arras jostatia,
bañan naitasunaren
guztiz beldurtia.

3

Amodiozko su gar
portitzen igesi,
oraindaño, maitea,
izandu naiz bizi:
bañan zure itxurak
zain odol ta guzi,
arras beti betiko
biotza dit josi.

4

Nere maite maitea,
ustez ustekabe
betiko egin zaizkit
biotzaren jabe:
iltze gogorraz ondo
loturik alere
nere korde guztiak
geroztikan daude.

5

(Ikusi) albazentza
jarririk begira
nere biotz gaixoan
dagoen erida:
batean bazterrera
bestean erdira,
gorputz guztian dabil
jira eta bira.

6

Egunaz ere bai, ta
gauaz asko aldiz,
nere odolak pill pill
irakiten dabiltz:
ixuriko nituzke
ala bear balitz,
maite zaituralako
biotzetik anitz.

7

Aingeru gazte eder
goixo eta piña,
zu maitatutzeko da
beti nere griña:
sendatu albazentza
nik daukadan miña,
nere biotz gaixoak
a zer atsegiña!

8

Maite maitagarria
zugana begira,
nere biotz biguña
urtutzen ari da:
egun oetan guztiz
estu ta larri da,
azal uts biurturik
neketan jarri da.

9

Biotz biotz nereko
maitati maitea,
nere pena andiaz
urriki zaitea:
zure eskuan dago
nere izatea,
indazu osasuna
ta atsegin betea.

10

Nere maite polita
iñolaz albada,
ez nazazula arren
penaturik laga:
zu maitatzeagatik
ala bear bada,
bizia utziko det
orain bereala.

11

Galdu arren bizia
sekula betiko,
amodioa ezdit
iñork erekiko:
zu maitatu bage nik
ez nuke etsiko,
biotzaren mamitik
etzaitut utziko.

12

Ezur ta mami oso
zain odol ta guzi,
maite zaitut maitea
ez alere gutxi:
naitasun bero oni
ez aterik itxi,
zure albo gozoan
nai nuke nik bizi.

AMODIOA ZER DAN

1

Amodioa zer dan
azaltzeko ongi,
kanta berri eder bat
jarzera noa ni:
munduak jakitea
guztiz da konbeni
nola bizitu diran
txatxantxo gozo bi.

2

Badakigu dala txit
gozo ta ezta
enamoratutako
gazteen bizia:
duda bage da oen
atsegin guztia,
eraz eta sarriro
alkar ikustia.

3

Biotz bi unituak
maitaro alkarri,
laztandurik betiko
oi dirade jarri:
atsegin andietan
guztiz arrigarri,
itz goixoak esanaz
batak besteari.

4

Aditutzean batak,
bestearen itza,
bien biotzak pozez
pill pill pill dabiltza:
eztitan oi dabillen
euliaren gisa,
zeñek gozatutzen du
onelako ditxa?

5

Zoriontasun andi
gozo onen jabe,
Gipuzkoa onetan
bi gazte ba daude,
elizaz unituak
gustora alere,
iñork prenda artzeko
beldurrikan bage.

6

Goqoratu zait neri
garbi esatea,
amanteak nor diran
bata ta bestea:
zarauztar Don Juan Jose
Alzuru gaztea,
ta Doña Mariana
bere emaztea.

7

Txatxantxo maitati au
dalako alaia,
beti beti izanda
guztiz askok naia:
batetik ederra da
bestetik ernaia,
ezta erraz billatzen
onelako gaia!

8

Aitortu bear bada,
garbiro egia,
dama polita da ta
guztiz egokia:
goiz aski bota zion
Alzuruk begia,
artu ere bai ongi
goruntzen neurria.

9

Amasei urterekin
txit gain gañekoa,
Doña Mariana zan
guri sasoikoa:
begia txir txir, eta
alegre gogoa,
nork maitatuko ez du
ziñez alakoa?

10

Milla zortzi-eun ogei
ta bederatzian,
txatxantxo goixo oek
laztandu zirean
pena asko pasarik
bai zazpi urtean
ezkondurik daude gaur
pozakida betean.

11

Amante oek nola
izan diran bizi
ikusi bage ezin
lezake sinitsi
Alkarganatu naita
inok ez nai utzi
egun gozo au nekez
bait dute iritsi.

12

Naitasun geiegia
izanik alkarri
ikusi dute zenbait
estura ta larri
baita igaro ere
pena arrigarri
ezkondurik gustora
diran arte jarri.

13

Ezkontzeko denpora
danean iritsi
ez dute bada izan
atsekabe gutxi
Azpeitian egon ta
apartean bizi
nai arren ezin alkar
gustora ikusi.

14

Berronkalkoan bata
Ibiron bestea
poz andia zuten txit
alkar ikustea
eguna alegre ta
gaua txit tristea
gogoratu zitzairen
argiak piztea.

15

Gauaz eta egunaz
alkarri begira
loaz oroitu bage
ernai egon dira
au izan da txatxantxo
goixo oen ira [jira?]
plazan ibilli arren
zezenen korrira.

16

Abuztuko illaren
bigarren eguna
amante oentzako
etzan txit illuna
orduan izan dute
gutzizko fortuna
Jaungoikoak diela
beti osasuna.

DOZEN ERDI BAT BERSO

1

Dozen-erdi bat berso
bear ditut jarri
erregalatutzeko
dama-galai biri:
gutzizko naitasuna
diote alkarri,
non ta nongoak diran
esango det sarri.

2

Andoain-en dago bat,
Tolosan bestea,
gustatuzen zaie maiz
elkar ikustea:
dama ederra da ta
galaia gaztea
ez ta gaizki izango
onen emaztea.

3

Gazte maitati oek
txit ditut urriki
batak bestea bistan
nai dute iduki:
aspertu bagetanik
gau ta egun beti,
Andoain-dik Tolosa
ez dago urruti.

4

Galai au nor dan iñork
nai baluke jakin,
apellidua Imaz
izena du Joakin:
artutako sallari
gogoz zaio ekin,
gusto obeko lanik
ez dezake egin.

5

Maria Mikaela
de Elorriaga,
dama maitati eder
zurigorria da:
Imaz-ek beretzako
nai luke al bada,
ezta non-nai billatzen
alako alaba.

6

Tolosa-ra joaten
billatzeko bera,
Etxarri-ren bitartez
izaten du era:
iñoiz ikusi ditut
gustora daudela,
Joakintxo Imaz eta
Mikela ederra.

MUNDU GUZTIAN DAUKA

1

..... a da
guztiz egokia
aspaldian zenbaitek
gogoan eukia:
kontentu da galaia
orobat nobia,
A, zeñek leukakean
gaur oien tokia!

2

Mundu guztian dauka
gizon prestu fama,
Don Jose Franzisko da
Arrieta jauna:
zuzen egiten badu
artu duen lana,
zoriontsu da orren
jabe egin dana!

3

Ongi dakigu nor dan
eta nolakoa,
Doña Mari Antoni
Bidaola-koa:
berez alaia da, ta
sasoi onekoa,
inon arkitu beste bat
au bezelakoa!

4

Gazte gaztetatik da
doañez jantzia,
bere amak alboan
guriro azia:
Jaungoikoak emanik
alako grazia,
goxo ta maitati da
esan al guzia!

5

Ezkontz au ikusirik
oien gurasoak
atsegiñetan daude,
orobat auzoak:
Jainkoari egiñaz
erregu gozoak,
izan ditezen beti
garbi ta jasoak.

6

Zeñek egingo ez du
pozkidaz algara?
nere gogoa beintzat
gaurkoan ala da!
Jaunari eskaturik
iñolaz al bada,
izan ditzaten asko
seme ta alaba.

7

Burnia egiteko
beti da autua
Olako sutan arri
ongi berotua:
ugari emango du
ark bere frutua,
lenago sarritxotan
ez bada urtua.

NOIZ IZANGO OTE DITUGU

Noiz izango ote ditugu
orren ezteiak?
Lenik bota bear deiak
badakit dituen gaiak
ordea ez dira erraz asetzen
orren naiak.
Zartzen asi ezkeroko galaiak
a, zer amorraiak!
nekez arrapatu sare lasaiak
ain dira ernaiak.
Noiz edo noiz itsutzen ditu
ur loiak
diradelako txisarekoiak;
askotxo jan ta garrasi ta
orroiak
irabiatzen dituzte beeak eta
goiak.

IZTUETA'REN ESKUTITZA AGUSTIN PASCUAL

1

Nere adiskide txit
prestu ta argia:
artu baitet bedorren
karta pozgarria;
aiñ zegoen gozoa
ta ongi jarria
ez da bedorrentzat au
mirari aundia.

2

Ezkontzak izan oi du
asko langai modu,
batean irabazi
ta bestean galdu;
alaba utzitzea
ez nuke aiñ damu,
baldin senarrak ongi
maitatutzen balu.

3

Erri aundi oetan
askotatik gutxi
senarrarekin ongi
oi dirade bizi;
batzuek zatika ta
besteak igesi
ezkondu bezin laister
oi dituzte utzi.

4

Egin ezkerotzani
alakoen jabe
eraman bear ditu
zenbait atsekabe.
Neska zar egoteaz
ere lanak daude
iñork ez nai gelditu
bat edo bat gabe.

NERE MAITE POLITA

1

Nere maite polita
zutzat oroitzian
odola pil-pil dabil
nere biotzian,
Kanpora irten nairik
alegiñ guzian;
miñ onek bearko du
sendatu iltzian.

2

Amoriyoz biotza
daukat nik zulatzen;
zuregatikan zenbat
detan nik sufritzen!
zergatikan ez zera
zu nitzat kupitzen?
Zuregatik ari naiz
ezur uts gelditzen.

Maitasunak indarra
 artzen dubenian
 erruak uzten ditu
 biyotz barrenian;
 zuretako jaio naiz
 zuretako azi,
 zuregatikan nai det
 mundu ontan bizi.

MANUELATXO

Belaunikaturik
 zure aurrean nago,
 nai zenduen gisan,
 alkarren jabe
 zuk nai badezu
 egin gaitian elizan.

EZKON BERRI

Zorioneko ezkon-berriak,
 alai ikusten dituzuen begiak
 «pil, pil, pil»
 mingaña ixil biotzak itz-egin
 lo pixkatxoren bat nai dute egin.
 Lotaratzean orain ta beti
 Jaungoikoaren legea zuzen eduki
 gogoan.

Etsai guztiak garaitu ondoan
 bera egon dedin zuen alboan.
 Oeratzean, ai ura poza!
 Gozotoro esanaz maite biotza
 alkarri.

Esker onak eman Jaungoikoari
 nai eran zaituztelako jarri.
 Itzaldi goxo ezti eztiak,
 gau artan oi dirade guzti guztiak,
 emeki.